

# **Odluka kojom se smjenjuje gospodin Dragomir Vasić sa položaja poslanika Narodne skupštine Republike Srpske i odbornika u Skupštini opštine Zvornik**

*Koristeći se ovlaštenjima koja su Visokom predstavniku data u članu V Aneksa 10. (Sporazum o implementaciji civilnog dijela Mirovnog ugovora) Općeg okvirnog sporazuma za mir u Bosni i Hercegovini, prema kojem je Visoki predstavnik konačni autoritet u zemlji u pogledu tumačenja Sporazuma o implementaciji civilnog dijela Mirovnog ugovora; i posebno uvezši u obzir član II 1. (d) istog Sporazuma prema kojem Visoki predstavnik "pomaže, kada Visoki predstavnik ocijeni da je neophodno, u rješavanju svih problema koji se pojave u vezi sa implementacijom civilnog dijela Mirovnog ugovora";*

*Pozivajući se na stav XI.2 Zaključaka Konferencije za implementaciju mira održane u Bonu 9. i 10. decembra 1997. godine, u kojem je Vijeće za implementaciju mira pozdravilo namjeru Visokog predstavnika da upotrijebi svoj konačni autoritet u zemlji u vezi sa tumačenjem Sporazuma o implementaciji civilnog dijela Mirovnog ugovora, kako bi pomogao u iznalaženju rješenja za navedene probleme "donošenjem obavezujućih odluka, kada ocijeni da je to neophodno", o određenim pitanjima, uključujući i (prema tački (c) stava XI.2) mjere kojima se obezbeđuje implementacija Mirovnog sporazuma na cijeloj teritoriji Bosne i Hercegovine i njenih entiteta koje "mogu da uključe preuzimanje mera protiv osoba koje obavljaju javne funkcije";*

*Konstatujući da je u stavu X.4 Aneksa Deklaracije Vijeća za implementaciju mira sačinjenoj u Madridu 16. decembra 1998. godine navedeno da Vijeće potvrđuje kako se čelnicima kojima Visoki predstavnik zabrani obavljanje javnih funkcija "može takođe zabraniti da se do daljeg kandidiraju na izborima i da obavljaju bilo koju drugu izbornu ili imenovanu funkciju i zauzimaju funkciju u političkoj stranci";*

*Vodeći računa o činjenici da proces implementacije mira, koji se i dalje odvija pod pokroviteljstvom Općeg okvirnog sporazuma za mir u Bosni i Hercegovini, nije još završen;*

*Vodeći računa takođe očinjenici da se proces implementacije mira mora dovršiti kako bi se uspostavilo stabilno političko i sigurnosno okruženje u Bosni i Hercegovini koje doprinosi, između ostalog, temeljnoj ekonomskoj reformi i povratku izbjeglica i raseljenih osoba;*

*Konstatirajući sa žaljenjem da je jedan broj osoba optuženih po članu 18. Statuta Međunarodnog tribunala za zločine počinjene u bivšoj Jugoslaviji uspio, barem do današnjeg dana, da izbjegne krivično gonjenje, i da do izbjegavanja krivičnog gonjenja ne bi moglo doći bez pomoći drugih pojedinaca i tijela, pri čemu je izvršena opstrukcija implementacije Općeg okvirnog sporazuma za mir u Bosni i Hercegovini;*

*Konstantno svjestan potrebe za održavanjem pravilne ravnoteže između općeg dobra i individualnih prava;*

Iz gore navedenih razloga, Visoki predstavnik ovim donosi slijedeću

## **ODLUKU**

**kojom se smjenjuje gospodin Dragomir Vasić sa položaja poslanika Narodne skupštine Republike Srpske i odbornika u Skupštini opštine Zvornik , i zabranjuje mu se obavljanje svake službene, izborne ili imenovane javne funkcije, kao i kandidiranje na izborima i obavljanje funkcije u političkoj**

stranci, ukoliko ili sve dotle dok ga Visoki predstavnik naknadnom odlukom eventualno izričito ne ovlasti da iste obavlja. Odmah mu prestaju sva prava na naknade odnosno privilegije ili status koja proizilaze iz njegovog položaja poslanika Narodne skupštine Republike Srpske i odbornika u Skupštini opštine Zvornik.

Ova odluka stupa na snagu odmah i neće zahtijevati preuzimanje dodatnih proceduralnih mjera. Gospodin Vasić mora odmah danapusti svoje urede.

Ova odluka objavljuje se odmah u Službenom glasniku Republike Srpske.

#### **RAZLOZI ZA SMJENU**

Gospodin Vasić je poslanik Narodne skupštine Republike Srpske i odbornik u Skupštini opštine Zvornik. On je povezan sa nečuvenim aktivnostima kojima se obezbjeđuje materijalna podrška i izdržavanje jednom od optuženih ratnih zločinaca po navedenom članu 18, naime, g. Radovanu Karadžiću.

G. Vasić na ovaj način vrši opstrukciju mirovnog procesa i mora biti smijenjen sa javne funkcije.

*Sarajevo, 7. juli 2003. god.*

*Paddy Ashdown  
Visoki predstavnik*